



'Storianan di Dooi' awor riba mercado

Bunita coleccion di storianan local, conserva pa futuro generacionnan



Storianan di Dooi

Theodor "Dooi" Dañe



ORANJESTAD (AAN): Tur pueblo, incluyendo Aruba, conoce su contadonan di cuenta, hendenan cu na un forma fenomenal ta pone otro hende pensa, gosa y hari. Nan ta domina nan idioma bon, ta bon conoci cu cultura di nan pueblo, cu custumbernan y cu expresionnan y palabranan poco uza awendia. Nan cuentanan of storianan por ta serio, chistoso, surrealistico of yena cu fantasia pero ta duna bista di e ambiente den cual nan ta of tabata biba. E cuentanan ta bisa algo di e alma di un pueblo.

Un di e personanan aki ta Theodor Dañe, conoci como Pachi Dooi y cu nobenticinco aña pasa a nace den distrito di Santa Cruz. Pachi Dooi tawata un persona cu tabata gusta conta di pasado y cu

tawata corda hopi cuenta di antes. Lamentablemente den luna di April di e aña aki Pachi Dooi a fayece, pero no sin laga atras un teroso den forma di storianan cu e tabata conta cu masha fervor. Na edad halto Pachi Dooi a dicidi di pone su storianan riba papel y a yena schriftnan completo. Lucia Kelly cu ta haci historia oral, a yuda cu e publicacion.

UNOCA a tuma nota di e storianan y a reconoce nan importancia. Ta importante pa colecciona y conserva esakinan pa futuro generacionnan, mirando cu nan ta bisa algo di nos cultura y identidad. UNOCA awor tin e placer pa informa publico di e prome publicacion di e serie "Storianan di Dooi". Pachi Dooi y su casa Colati a logra

wak e prome buki aki y nan a keda hopi contento pero lamentablemente pa motibo di malesa y fayecimento no por a presenta e buki oficialmente na publico nan mes.

Na nomber di e yiunan, UNOCA ta informa cu e buki aki awor ta na benta na oficina di UNOCA situa na Stadionweg 21. UNOCA lo haci donacion di e buki na Biblioteca Nacional, Departamento di Cultura y Archivo Nacional.

E buki ta obtenibel tambe den boekhandel rond di nos isla. UNOCA y Famia di Pachi Dooi ta spera y ta aprecia si esnan cu lo haya of cumpra e buki, lo sa di duna balor na un talento cu no t'ey cu nos mas.

Pachi Dooi a hinca hopi energia y tempo pa skirbi su storianan di antes.

Telefonnan di DIARIO
582 6747 / FAX 582 8551